



Fasnacht 2023

Sujet: **Mir schwinge syt 35 Joor durch d'Fasnacht**

Mir dörfe das Joor jubiliere,
und mit userem Sujet brilliere.
Guet bi 35 Joor tuet me nit feschte,
mir aber scho, mir ghöre zu de Beschte.
Genau wie im Summer in de Hülftte hinte,
wo sie dr bescht Schwinger wänd finde.
Das Sujet wird einigi Mol cho,
au vom Komitee so händ mir's verno.
Aber unser Sujet isch e Pracht,
„Mir schwinge syt 35 Joor durch d'Fasnacht“.

Das ESAF das vergässe mir nie,
probiere mit unserer Clique Parallele zieh.
Agfange het's mitem Aschwinge,
grad direkt nach dr Nationalhymne singe.
Dr erschi Gang wär gar nit sündig,
bi uns im 1988 unseri Gründig.
Denn die erschi Fasnacht, uns wird's hüt no Angscht und Bang,
dass wär am ESAF denn dr zweiti Gang.
Denn goht's witer Maa gege Maa,
jeder isch sicher 4 Mol dra.
Das nennt me in Fachkreis Usschwinge,
und söll die Beschte witerbringe.
Am ESAF wär's Gang drei und vier,
mit zwüschedure Wurst und Bier.
Bi uns wär's gueti Sujet z'finde
und dr Wage drmit kreiere vo vorne bis hinte.
Au s'Koschtüm muess passe vo Larve bis Sogge,
so wie e guet glungene Wyberhogge.
So händ mir's immer gmacht, das isch wohr,
im Cliqueläbe wäre dass öpe die erschte 15 Joor.
Aber es isch jo no witer gange,
um Dorfplatzrueche hesch nie müesse bange.

Ganz im Gegesatz mir müent das do nenne,
zu dene wo am Sunntigmorge müent Farb bekenne
und es im Gang fünf und sächs nümme richtig bringe,
eifach nümme so super schwinge.
Für die isch es denn fertig an und für sich,
heisst bim Schwing fertig im Usschtich.
Fertig sind mir aber nonig gsi
und schwuppdiwupp sind mir scho 30 Joor drby.
So e Leischtig het scho si Glanz
und mir verdiente do drfür e Chranz,
genau wie die am ESAF im Summer,
wo dr siebti und ahti Gang gschafft händ ohni Chummer,
guet überstünd und stolz sind uf sich,
die sind nämli im Chranzusschtich.
Am Schluss wärde die beschte 15 bis 18 Prozent,
ja das händ au mir erkennt,
belohnt miteme Eichelaub-Chranz,
dr Eint oder Ander macht e Freudetanz.
Doch dr Schlussgang dä chunnt jo no,
wenn die 2 Beschte tüent zämmegriffe und sich gegenüberstoh,
bis dr Eint mitem Rugg s'Sagmähl berührt
und e ganzi Arena zum Juble verführt.
Dr Joel Wicki das müent mir anerkenne,
dörf sich neu „Schwingerkönig« nenne.
Doch zrugg zu uns Dorfplatzrueche
mir möchte s'Schwinge nit versueche,
stattdesse wänd mir lieber Fasnacht mache,
die Tradition pflege und drby au lache.
D'Vorbereitige sind oft sehr lang,
drfür händ mir jedes Joor unsere Schlussgang.
Bim Ertöne vom Böllerschuss
erläbe mir d'Fasnacht voller Gnuss,
denn im Gegesatz zum ESAF, das isch verby,
sind mir Joor für Joor witerhin drby.
Wie hüt mit 4 Ehredame und 4 Schwinger,
drum goht die Fasnacht au viel ringer.

Die nächshti Fasnacht im 2024 tüent mir scho bueche,
drum gniesset d'Fasnacht und bis bald Euri Dorfplatzrueche.